



KENYATAAN MEDIA

UNTUK SIARAN SEGERA

PTPTN PRIHATIN AGIH BAKUL MAKANAN KEPADA ASNAF

1. Perbadanan Tabung Pendidikan Tinggi Nasional (PTPTN) sentiasa prihatin dalam membantu masyarakat terutamanya golongan asnaf melalui program-program tanggungjawab sosial korporat (CSR) yang dianjurkan. Mendengar dan merasai keluh resah serta kesusahan yang dialami masyarakat terutamanya ketika negara dilanda pandemik Covid-19, PTPTN terpanggil untuk sama-sama membantu mereka.
2. Kali ini, PTPTN memperuntukkan sebanyak RM300,000 untuk membantu golongan sasaran menerusi program PTPTN Prihatin. Dianggarkan sebanyak 3,750 keluarga asnaf yang terjejas ekoran penularan Covid-19 akan dapat dibantu melalui peruntukan ini yang dianjurkan dengan kerjasama Pertubuhan Kebajikan Dana Kita (DANA KITA). Setiap keluarga akan menerima sumbangan bakul makanan yang mengandungi barangan keperluan harian.
3. Agihan dimulakan hari ini di negeri Kedah dan Skwad PTPTN Prihatin akan bergerak ke negeri-negeri lain selepas ini. Pada hari ini, PTPTN dengan kerjasama Pusat Khidmat ADUN Bukit Kayu Hitam membuat agihan sumbangan kepada para penerima di kawasan berdekatan. Seterusnya, Skwad PTPTN Prihatin akan mula bergerak untuk mengagihkan sumbangan bakul makanan tersebut kepada penerima-penerima di negeri-negeri lain. Kesemua pengagihan sumbangan ini akan dibuat selaras dengan SOP yang ditetapkan oleh MKN.

4. Pengerusi PTPTN, Datuk Wan Saiful Wan Jan berkata, “Pelaksanaan PKP di seluruh negara ini telah menyebabkan ramai yang menghadapi kesusahan dan juga memberi kesan kehidupan kepada masyarakat terutamanya kepada golongan asnaf. Sebagai sebuah organisasi yang cakna dan prihatin, PTPTN melalui Skwad PTPTN Prihatin turut terpanggil untuk memberikan sumbangan kepada golongan asnaf yang terjejas.

5. “Oleh itu, saya berharap sumbangan sedikit sebanyak ini dapat membantu meringankan beban terutamanya kepada keluarga asnaf yang terkesan dengan penularan pandemik Covid-19 selain meletakkan PTPTN di tengah-tengah keperluan masyarakat dan dapat menjalinkan hubungan positif di antara PTPTN dengan pemimpin serta masyarakat setempat. Sumbangan ini adalah menggunakan wakalah zakat yang memang merupakan hak mereka yang layak. Saya harap ia akan membantu meringankan beban yang ditanggung,” tambah Wan Saiful lagi.

Perbadanan Tabung Pendidikan Tinggi Nasional (PTPTN)

16 Julai 2021